

2-§. Chet el valyutasidagi operatsiyalarni buxgalteriya hisobida aks ettirish

8. Chet el valyutasida ifodalangan aktivlar va majburiyatlar qiymati, buxgalteriya hisobida aks ettirish maqsadida, soʻmda qayta hisoblanishi lozim.

9. Chet el valyutasida ifodalangan aktivlar va majburiyatlar qiymatini soʻmda qayta hisoblash ushbu chet el valyutasining soʻmga nisbatan Markaziy bank kursi boʻyicha amalga oshiriladi.

10. Buxgalteriya hisobi maqsadlari uchun mazkur soʻmdagi qayta hisoblash chet el valyutasida operatsiya sodir etilgan sanadagi Markaziy bank kursi boʻyicha amalga oshiriladi. Buxgalteriya hisobi maqsadlari uchun chet el valyutasidagi ayrim operatsiyalarning sodir etish sanalari mazkur BHMCning ilovasida keltirilgan.

11. Buxgalteriya hisobida konsignantga nisbatan chet el valyutasidagi kreditorlik qarzi konsignasiyaga olingan tovarlarni sotish sanasida, ana shu sanadagi Markaziy bankning kursi boʻyicha vujudga keladi. Qarzdorlikning keyingi hisobi mazkur BHMSga muvofiq amalga oshiriladi.

12. Mahsulot (ishlar, xizmatlar)ga narxlar (tariflar)ni chet el valyutasiga ekvivalentlikda belgilaydigan, oʻzaro hisob-kitoblarni esa milliy valyuta — soʻmlarda amalga oshiradigan xoʻjalik yurituvchi subʼyektlar xizmat koʻrsatish sanasidan boshlab toʻlov kelib tushgan sanaga qadar davr ichida Markaziy bank kursining oʻzgarishi munosabati bilan yuzaga keladigan kurs farqini moliyaviy faoliyatdan daromad (xarajat) sifatida xoʻjalik yurituvchi subʼyektning moliyaviy natijalariga olib boradilar.